

समे .1815

<><><><><><>

Headlines

1. जम्मू च औद्योगिक स्थापत करने आस्तै 14 ज्हार 956 कनाल ते कश्मीर च 6 ज्हार 745 कनाल जिमीं मुंतकिल कीती गई, आखेआ उपमुख्यमंत्री होरें।
2. जम्मू कश्मीर जीएसटी कनून 2017 च संशोधन आस्तै उपमुख्यमंत्री होरें सदन च बिल पेश कीता।
3. जम्मू कश्मीर च 18 ज्हार मैगावाट अंदाजन पानी शा बिजली पैदा करने दी समर्थ मजूद—आखेआ मंत्री जावेद अहमद राणपा होरें। 5 ज्हार 463 घरें च 4 ज्हार 648 सरकारी इमारतें पर सोलर पॉवर पैनल लाए गे।
4. कोट भलवाल ग्रां थाहर गी साईंसी ढंगे आले ठोस कचरा प्रबंधन प्लांट च विकसित कीता जा'रदा ऐ—आखेआ मंत्री सकीना इत्तू होरें।
5. आईपीएल 2025 अज्जै थमां शुरू, उद्घाटनी मैच च कोलकाता नाईट राईडर्स ते रॉयल चैलेंजर्स बैंगलुरु आमने सामने।

<><><><><><>

Industrial Estates

उपमुख्यमंत्री सुरिंदर चौधरी होरें अज्ज गलाया ऐ जे जम्मू—कश्मीर च नमें औद्योगिक एस्टेट स्थापित करने दे मकसद कन्नै जम्मू संभाग च 14 ज्हार 959 कनाल ते 15 मरले जिमीं जिसलै के कश्मीर संभाग च 6 ज्हार 745 कनाल ते 19 मरले जिमीं मुंतकिल कीती गई ऐ। आकाशवाणी दे जम्मू संवाददाता दी रिपोर्ट मूजब, उपमुख्यमंत्री होरें अली मोहम्मद डार हुंदे आसेआ पुच्छे गेदे इक सोआलै दा परता दि'दे होई एह जानकारी सांझी कीती। उ'नें सदन गी दस्सेआ जे औद्योगिक एस्टेटें दी स्थापना लेई जम्मू संभाग च 9 ज्हार 661 कनाल ते 5 मरले जिमीं ते कश्मीर घाटी च 5 ज्हार कनाल ते 13 मरले जिमीं मुंतकिल करने लेई प्रस्ताऽ रक्खी दित्ते गेदे न। उ'नें दस्सेआ जे जम्मू—कश्मीर दी औद्योगिक नीति 2021—2030 दी मते तरजीह आहले खेत्तरें दी सूची च शिक्षा ते कौशल विकास मुख तौर उपपर शामिल ऐ ते एह खेत्तर, केन्द्री सैक्टर दी नमीं योजना 2021 दी 'सेवा खेत्तर आली सकारात्मक सूची' दा बी इक अहम हिस्सा ऐ।

<><><><><><>

GST Bill

उपमुख्यमंत्री सुरिंदर चौधरी होरें जम्मू-कश्मीर दे माल-समेयान ते सेवाएं सरबन्धी टैक्स यानि जीएसटी आहले 2017 ब'रे दे कानून च संशोधन मतल्लक बिल गी विधानसभा च सदन पटल पर रक्खेआ। आकाशवाणी दे जम्मू संवाददाता दी रिपोर्ट मूजब, इस बिल गी सरकारी गैजेट च पैहले गै प्रकाशित करी दित्ता गेदा ऐ। उपमुख्यमंत्री होरें एह बिल, मुख्यमंत्री ओमर अब्दुल्ला हुंदी थाहर, सदन च पेश कीता।

<><><><><><>

Hydro Power

जल शक्ति मैहकमे दे मंत्री जावेद अहमद राणा होरें गलाया ऐ जे जम्मू-कश्मीर कश 18 ज्हार मैगावाट दी अंदाजन पनबिजली समर्थ मजूद ऐ जेह्दे चा 14 ज्हार 867 मैगावाट दी शिनाख्त करी लैती गेदी ऐ। आकाशवाणी दे जम्मू संवाददाता दी रिपोर्ट मूजब, मंत्री होर विधायक मुबारक गुल हुंदे आसेआ पुच्छे गेदे इक सोआलै दा मुख्यमंत्री ओमर अब्दुल्ला हुंदी तरफा परता देआ करदे हे। मंत्री होरें विधानसभा गी एह जानकारी दित्ती जे शिनाख्त कीती गेदी कुल समर्थ चा 11 ज्हार 283 मैगावाट चिनाब थमां, 3 ज्हार 84 मैगावाट झेहलम थमां ते 500 मैगावाट रावी दरेया थमां औंदी ऐ। उ'नें इब्बी दस्सेआ जे शिनाख्त कीती गेदी कुल समर्थ चा अजें तोहड़ी केन्द्र शासित प्रदेश आहले सैक्टर च 1 ज्हार 197 इशारिया 4 मैगावाट, केन्द्री सैक्टर च 2 ज्हार 250 मैगावाट ते स्वतंत्र बिजली उत्पाद सरिस्ते यानि आईपीपी तैहत 92 इशारिया 7-5 मैगावाट दा लाह ठोआया जा'रदा ऐ। सौर उर्जा प्रोजेक्टें दे सरबन्धै च मंत्री होरें दस्सेआ जे 41 ज्हार 367 मैगावाट दी समर्थ कन्नै 4 ज्हार 648 सरकारी इमारतें ते 34 ज्हार 300 मैगावाट दी समर्थ कन्नै 5 ज्हार 463 रिहायशी इमारतें पर सौर उर्जा पैनल स्थापित करी दित्ते गेदे न।

<><><><><><>

Doda Water Day(byte)

डीसी दफ्तर डोडा च विश्व जल दिवस दे मौके इक कार्यक्रम दा सरिस्ता कीता गेआ जेह्दे च सारे जिला अधिकारिण शिरकत कीती। डीसी डोडा हरविंदर सिंह होरें इस मौके सारें गी पानी दी बचत ते इयानियत गी सुक्के थमां बचाने आस्तै सगंध चकाई। मीडिया कन्नै गल्लबात करदे होई सिंह होरें आखेआ “पानी गी खत्म होने थमां बचाने आस्तै सिर्फ सगंध चुक्कना गै काफी नेइं ऐ सगुआं एह्दे आस्तै जरूरी कदम चुक्कने दी जरूरत ऐ। उनें मन्नेआ जे वैश्विकरण ते जिंदगी जीने दे तरीके पर मता असर पाया ऐ ते कुदरती संसाधन घट्ट होई गे न। एह्दे कन्नै गै उनें सारें गी चला'रदे रमजान ते औने आले नरातें दी ममारकबाद दित्ती। हरविंदर सिंह होरें

<><><><><><>

किश्तवाड़ आहले सरकारी डिग्री कॉलेज दे एनसीसी एसडब्ल्यू युनिट ते पर्यावरण सरबंधी विभाग आसेआ जिला प्रशासन दे सैहयोग कन्नै अज्ज पानी सरबंधी कुल संसारी ध्याड़े दे सिलसिले च इक बशेश कार्यक्रम दा सरिस्ता कीता गेआ। किश्तवाड़ दे डिप्टी कमिशनर राजेश कुमार शवन होर इस कार्यक्रम दे मुख परौहने जिसलै के प्रोफेसर उमर दीन राथर होर मानजोग परौहने हे। इस मौके उपपर जिले दे मिडल स्कूल, हायर सैकेंडरें स्कूल ते कॉलेजें थमां 7 विद्यार्थिएं, पानी दी सांभ-संभाल बारै भाषण दित्ते। जिले भरै थमां तकरीबन 300 विद्यार्थिएं इस कार्यक्रम च बड़े जोश कन्नै हिस्सा लैता। इस सरबंधै च आकाशवाणी समाचार कन्नै गल्ल करदे होई जीडीसी किश्तवाड़ दे असिस्टेंट प्रोफेसर तबस्सुम सलीम होरें आखेआ

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>

Waste Management

जम्मू-कश्मीर सरकारै अज्ज विधानसभा च एह जानकारी दित्ती ऐ जे जम्मू नार्थ हलके हेठ औने आहले कोट भलवाल ग्रांड गी नाफेड दे तैहत ठोस कूड़े-कचरे दे साईसी ढंगै सिर प्रबंधन आहले प्लांट दे तौर उपपर विकसित कीता जा’रदा ऐ। आकाशवाणी दे जम्मू संवाददाता दी रिपोर्ट मूजब, सेहत मंत्री सकीना इत्तू होरें शाम लाल शर्मा हुंदे आसेआ पुच्छे गेदे इक सोआलै दा, मुखमंत्री ओमर अब्दुल्ला हुंदी तरफा परता दिं’दे होई एह जानकारी सांझी कीती। मंत्री होरें इब्बी दस्सेआ जे सरकार, ठोस कूड़े-कचरे सरबंधी मामलें दे हल लेई वचनबद्ध ऐ ते खासतौरा उपपर शैहरी इलाकें च इस समस्या दे नबेड़े लेई सक्रियता कन्नै गैहीं पुटिटयां जा’रदिआं न।

<><><><><><>

समाज गी नशे दी कवैतू दे माड़े नतीजें बारै जागरूक बनाने दे मकसद कन्नै समाज कल्याण विभाग आसेआ नशा मुक्त भारत अभियान आहले विशे तैहत कठुआ च इक वॉकेथॉन ते जागरूकता रैली दा आयोजन कीता गेआ। कठुआ दे समाज कल्याण अधिकारी विश्व बंधु होरें इस रैली गी झंडी दस्सियै रवाना करोआया जेहड़ी जिला लाईब्रेरी थमां शुरु होई ते शैहरा दे बक्ख-बक्ख बजारें चा लंगघने परैन्त मुखर्जी चौक पुज्जियै संपन्न होई गेई। खरी मती गिनतरी च नौजवानें इस रैली च हिस्सा लैता ते इस दरान उ'नें समाज गी नशे दे माड़े नतीजें बारै जागरूक बनाने दे संदेस देने आहले पोस्टर ते बैनर फगड़े दे हे। इस सरबंधै च होर मती जानकारी दि'दे होई कठुआ दे समाज कल्याण अधिकारी विश्व बंधु होरें गलाया

<><><><><><>

ऐल्लै जारी रमजान दे पवित्तर म्हीने सने औने आहले ध्यारें जि'आं शब-ए-कदर, ईद-उल-फिर ते नरातें दे मददेनजर बनिहाल दे सब डिवीजनल प्रशासन आसेआ खुराक, सिविल सप्लाई ते उपभोक्ता मामलें सरबंधी विभाग ते मुंसिपल कमेटी कन्नै रलियै बनिहाल इलाके च बजारै दी चानचक्क जांच आहला अभियान चलाया गेआ। एहदा मकसद बजारै च बेचे जा'रदे उत्पादें दी गुणवत्ता जकीनी बनाना हा। नायब तैहसीलदार तारिक हुसैन वाणी ते टीएसओ नजीर अहमद वाणी हुंदी अगुवाई आहली इस टीमै जम्मू-श्रीनगर राश्ट्री जरनैली सिडकै पर बनिहाल बजार दा चानचक्क निरीक्षण करियै उत्पादें दे मय्यार दी जांच कीती। नियमें दी उल्लंघना करने आहलें थमां 7 ज्हार 700 रपे बतौर जुर्माना बी वसूलेया गेआ। इस सरबंधै च होर मती जानकारी दि'दे होई बनिहाल दे नायब तैहसीलदार तारिक हुसैन होरें गलाया

<><><><><><>

IPL

इंडियन प्रीमियर लीग दा 18मां संस्करण अज्जै थमां शुरु होआ'रदा ऐ। उद्घाटनी मैच च अज्ज संजा रॉयल चैलेजर्स बैंगलुरु दा मकाबला पिछली बारी दी जित्ती दी टीम कोलकाता नाईट राईडर्स कन्नै कोलकाता दे ईडन गार्डन मैदान च होग। मैच सजां साढ़े 7 बजे शुरु होग। प्रतियोगिता च 10एं टीमें दे 74 मैच होंगन। फाइनल मैच 25 मई गी खेड्डेआ जाग। मैच कोला पेहले आईपीएल 2025 दा रंगारंग कार्यक्रम कन्नै शानदार उद्घाटन कीता जाग।

<><><><><><>